

BANKUAK. BBVAk %27,3 murriztu zituen etekinak 2002. urtean aurrekoaren aldean, egindako horniketa handiak direla eta. Hala ere, etekinak 1.719 milioi eurora heldu ziren. Entitateak iragarri du erosketa aukeren bila ari dela European eta AEBetan.

BBVAren etekinak 1.719 milioi eurora iritsi ziren iaz, %27,3 gutxitu arren

Entitateak iragarri du beste bankuren bat erosteko aukeraren bila dabilela European eta Estatu Batuetan

Erredakzioa | BILBO

BBVAren iazko mozkin jaitsieraren arrazoi nagusia, entitateak egindako 427 milioi euroren ezohiko horniketak izan direla azaldu zuen Francisco Gonzalez bankuko presidentea atzo Madrilen. Horniketa horiek taldearen kapitala sendotzeko izan dira, baita «erosketa auke-

rak etortzen direnean, prest egoteko ere». Diru horniketa hori aintzat hartu gabe, bankuaren etekin jaitsiera %9,2koa izango zen, eta irabaziak 2.146 milioi eurora iritsiko ziren.

Beste bankuren baten balizko erosketaren inguruan, Gonzalezek iragarri du BBVA Italian ari dela begiratzen, non Bilboko entitateak BNL bankuan partai-

detza garrantzitsua daukan (%15). Horrez gain, Europako beste zenbait herrialdetan eta AEBetako hegoaldean ere bilatzen ari direla azaldu zuen Gonzalezek, baina ez zuen zehaztu zein herrialdetan ezta zein banku erosteko asmotan dabilen ere. AEBetan «zerbait egin dezakegula uste dugu» aipatu zuen, ordea.

Erosteko asmo horrekin lotu zuen Gonzalezek iazko emaitzen kontura egindako horniketa. «Giharra sendotu nahi dugu, aukerak iristen zaizkigunean baliatu ahal izateko», aipatu zuen, eta SCHko presidente Emilio Botinen adierazpenei erantzunez, «gu bai, erosketak egiten ari gara», esan zuen.

Europako onenen artean

BBVAko presidentea onartu zuen erosketa aukera hori nekez aterako dela Espainian. Hala ere, «edozein aukera aintzat hartzeko prest gaude», azpimarratu zuen.

Bankuak ez omen du Europako bankurik errentagarriena izateko helbururik, bere lehiakide SCHko presidentea halako helburua duela iragarrita ere. «Gu nahikoa kontserbadoreak gara, eta onenen artean egoteko helburua besterik ez daukagu, baina ez diru sarreraren aldetik, baizik eta eraginkortasun, errentagarritasun eta akzioen gaineko mozkinen ikuspegitik, adierazle horiek neurtzen baitute entitate baten kudeaketa ona», azaldu zuen.

Aurtengo ekitaldia «zailtasun handiekin» aurreikusten duela onartu du Gonzalezek, alde batetik, European interes tasak jaisteko posibilitate asko ikus-

ten duelako, eta bestetik, arazo «geopolitikoengatik», Iraken aurka prestatzen ari den eraso militarra aipatuz.

Merkatu kuota handitu

Hala ere, BBVAk baikortasunez begiratzen dio aurtengo ekitaldiari. Izan ere, BBVAk Espainiako merkatu kuota handitzeko asmoa dauka aurtan, azken urteetan BBVren eta Argentariaren bat-egitearen ostean galdu ostean. Kuota hazkunde hori ez du egingo prezioak jaitsiz eta marjinak gutxituz, ordea, baizik eta «bezeroei zerbitzuaren kalitatea hobetuz»

Latinoamerikari dagokionez, BBVAk Mexikon eta Txilen zabaldu nahi du bere merkatua. Bi herrialde hauetako filialek, Argentinakoak ez bezala, gehitu egin zuten taldearen etekineterako elkarpena iaz.

Azkenik, Gonzalezek onartu du BBVAko administrazio kontseiluko kide batzuen dimisioa eskatu zuela, hain zuzen ere bankuak paradisu fiskaletan zeuzkan ezkutuko kontuei lotutako jubilazio pentsio funtsak zituzten kontseilarien dimisioak. Garzon epaileak kontseilari hauei iruzurra egotzi ostean, bankuak «izugarritzko presioa» jasan behar izan zuela azaldu du Gonzalezek.

Francisco Gonzalez BBVAko presidentea iazko balantzearen berri eman zuen atzo Madrilen.

ANGEL DIAZ / EFE



ESANAK

FRANCISCO GONZALEZ (BBVAko presidentea)

«Gu bai, erosketak egiten ari gara, eta European eta AEBetan begiratzen ari gara»

«Giharra sendotzen ari gara, geure aukera iristen denean baliatu ahal izateko»

«Europako onenen artean egon nahi dugu, ez sarreretan, baizik errentagarritasunean»

BBVAREN EMAITZAK

BALANTZEA	2002	2001	ALDAKETA
Aktiboak guztira	279.542	309.246	-9,6
Bezerok gaineko kredituak (gordina)	146.412	156.148	-6,2
Bezeroen baliabideak balantzean	180.570	199.486	-9,5
Kudeatutako bezeroen beste baliabideak	108.815	124.496	-12,6
Kudeatutako bezeroen baliabideak guztira	289.385	323.982	-10,7
Funts propioak	12.351	13.315	-7,2

EMAITZA KONTUA	2002	2001	ALDAKETA
Bitartekaritza marjina	7.808	8.824	-11,5
Oinarritzko marjina	11.476	12.862	-10,8
Marjina arrunta	12.241	13.352	-8,3
Ustiapen marjina	5.577	5.599	-0,4
Ustiapen marjina Argentinarekin	5.251	5.109	2,8
Zerga aurreko mozkina	3.119	3.634	-14,2
Taldearen mozkina	1.719	2.363	-27,3

datuak milioi eurotan
Iturria: BBVA